



Datë: 18.06.2025

Numër Protokolli: 4197/2025

A.nr.695/2025

Këshilli i Pavarur Mbikëqyrës për Shërbimin Civil të Kosovës-Kolegji për shqyrtimin dhe vendosjen e ankesave në përbërje nga: Malsore Gashi-Bajraktari, kryetare, Eshref Shabani dhe Ardita Haxhnikaj Demi-anëtarë, me Atdhe Gashi, në cilësinë e procesmbajtësit, në procedurë sipas ankesës me numër A.nr.695/2025, të datës 22.04.2025, të parashtruar nga ankuesja Xh.P, kundër organit të punësimit/Agjencia Kosovare për Krahasim dhe Verifikim të Pronës, në çështjen juridike “*kontestim konkursi*”, duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3 dhe nenin 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180, dhe Rregulloren Nr. 02/2018 për Procedurën e Shqyrtimit dhe Vendosijes së Ankesave në Këshillin e Pavarur Mbikëqyrës për Shërbimin Civil të Kosovës, me datë 18.06.2025, mori këtë:

V E N D I M

Hedhet poshtë si e palejuar ankesa me numër A.nr.695/2025, e datës 22.04.2025, e parashtruar nga ankuesja Xh.P.

A r s y e t i m

Ankuesja, Xh.P (*në tekstin e mëtejme referuar: Ankuesja*), më datë 22.04.2025, ka parashtruar ankesë në Këshillin e Pavarur, Mbikëqyrës për Shërbimin Civil të Kosovës, kundër procedurës së rekrutimit, të datës 21.01.2025 të shpallur sipas Konkursit me numër reference RN00016385, në Agjencinë Kosovare për Krahasim dhe Verifikim të Pronës, për pozitën e punës *udhëheqës në Devizionin për Komunikim me Publikun*.

Kolegji për Shqyrtimin dhe Vendosijen e Ankesave (*në tekstin e mëtejme referuar: Kolegji i Këshillit*) duke ju referuar shkresave të lëndës të parashtruar nga palët në procedurë ka gjetur se ankesa e parashtruar nga ankuesja me datë 22.04.2025, **është e palejuar**, sepse:

Nga administrimi i shkresave të lëndës rezulton se Agjencia Kosovare për Krahasim dhe Verifikim të Pronës, më datë 21.01.2025, ka shpallur konkursin me numër reference RN00016385, për pozitën e punës, *Udhëheqës në Devizionin për Komunikim me Publikun*, me afat aplikimi nga data 21.01.2024 deri më datë 19.02.2024.

Nga shkresat e lëndës, rezulton se në këtë konkurs kanë aplikuar gjithsejtë 21 kandidatë, ndërsa prej tyre, kriteret e konkursit i kanë plotësuar dhe kanë hyrë në liste të ngushtë 8 kandidatë, në mesin e tyre edhe ankuesja, e cila sipas shkresave të lëndës rezulton se nuk ka marrë pjesë në vlerësimin profesional të kandidatëve, përkatësisht në testin me shkrim.

Ndërsa, sipas Njoftimit të datës 21.03.2025, të, rezulton se kandidati A.B, me gjithsejtë 95 pikë të arritura nga kjo procedurë rekrutimit, është shpallur kandidat fitues për pozitën e punës *Udhëheqës në Devizionin për Komunikim me Publikun* në kuadër të Agjencisë Kosovare për Krahasim dhe Verifikim të Pronës.

Ankuesja, në ankesën e parashtruar në Këshillin e Pavarur Mbikëqyrës për Shërbimin Civil të Kosovës, pretendon se procedura e testit me shkrim është zhvilluar përmes shkeljeve dhe favorizimeve.

Kolegji i Këshillit lidhur me pranueshmerinë e ankesës iu referua dispozitave të Ligjit Nr.08/L-197 për Zyrarët Publikë, përkatësisht nenit 27 paragrafi 4 ku përcaktohet se: “4. E drejta e ankimimit në KPMSHCK i njihet edhe çdo kandidateje/i në procedurë pranimit në shërbimin civil”, si dhe dispozitave të Ligjit Nr.05/L-031 për Procedurën e Përgjithshme Administrative, përkatësisht nenit 14 ku përcaktohet se “Palë në procedurën administrative mund të jetë çdo person fizik, person juridik apo grup personash me një interes të përbashkët: 1.1. me kërkesë të të cilit organi publik ka filluar procedura administrative; 1.2. ndaj të cilit ka filluar procedura administrative apo të cilit rezultati i procedurës administrative mund t’i cenohet të drejtat apo interesat juridike. 2. Palë në procedurën administrative janë, gjithashtu, dhe mbrojtësit e interesave publike të autorizuar me ligj të veçantë, si dhe mbrojtësit e interesave kolektive apo të interesave të gjera të publikut, nëse këto interesa mund të cenohen nga rezultati i procedurës administrative”, nenit 103 paragrafi 2, ku përcaktohet se: “2. Procedura administrative e nisur sipas kërkesës, gjithashtu do të përfundohet, kur nga rrethanat rezulton pa asnjë dyshim se pala nuk ka më interes në vazhdimin e saj dhe e ka braktisur atë”, si dhe nenit 124 paragrafi 1, të të njëjtit ligj me të cilin parashihet se: “Pala ka të drejtë të ushtrojë mjetet juridike administrative ndaj çdo veprimi apo mosveprimi administrativ, nëse pretendon se të drejtat apo interesat e saj juridike cenohen nga ky veprim apo mosveprim,” dhe si rrjedhojë referuar dispozitave përkatëse ligjore, Kolegji i Këshillit, konstaton se me zhvillimin e procedurës përkatëse të rekrutimit, gjegjësisht me mbajtjen e testit me shkrim dhe si rrjedhojë shpalljen e kandidatit fitues për pozitën e shpallur me konkursin me numër reference RN00016385, ankueses nuk është cenuar ndonjë e drejtë apo interes juridik lidhur me kandidimin e saj për pozitën Udhëheqës/e në Divizionin për Komunikim me Publikun, ngase e njëjta duke qenë se ka kaluar fazën e verifikimit, sipas shkresave të lëndës, përkatësisht sipas njoftimit të datës 06.03.2025, konstatohet se është ftuar nga Divizioni i Burimeve Njerëzore të Agjencinë Kosovare për Krahasim dhe Verifikim të Pronës, për mbajtjen e testit me shkrim të datës 14.03.2024, mirëpo nga shkresat e lëndës rezulton se e njëjta nuk ka marrë pjesë në testin me shkrim, nga rrjedhë se ankuesja me vetë dëshirë e ka braktisur pjesëmarrjen në procedurën përkatëse të rekrutimit, dhe si rrjedhojë e njëjta nuk ka legjitimitetin e palës në këtë çështje juridiko-administrative, dhe rrjedhimisht në mungesë të legjitimitetit të palës ankesa A.nr.69/2025 është e palejuar në kuptim të nenit 129 paragrafi 1 nën paragrafi 1.2 të Ligjit Nr.05/L-031 për Procedurën e Përgjithshme Administrative.

Andaj, bazuar në nenin 44 të Ligjit Nr.08/L-197 për Zyrtarët Publikë, ku përcaktohet se: *2. Kandidatet/ët e pakënaqur me procesin e rekrutimit, pas shpalljes së rezultateve përfundimtare kanë të drejtë ankese në KPMSHCK sipas afatit të përcaktuar në ligjin përkatës për procedurën administrative.*; dhe duke marrë për bazë konstatimin e më sipërm se ankuesja me vet dëshire është tërhequr nga procedura e rekrutimit, gjegjësisht nga vlerësimi profesional i kandidateve, Kolegji i Këshillit, konstaton se të njëjtës nuk i është cenuar asnjë e drejtë në këtë procedurë rekrutimi, dhe si rrjedhojë Kolegji nuk është lëshuar në trajtimin e vlerësimit profesional nga testi me shkrim dhe intervista me gojë e kandidatëve pjesëmarrës nga kjo procedurë rekrutimi.

Kështu që, për sa me sipër, Kolegji konstaton se në rrethanat e rastit konkret nuk janë plotësuar kushtet ligjore për pranueshmerinë e ankesës në kuptim të nenit 129 paragrafi 1 nën paragrafi 1.4 ndërlidhur me nenin 125 paragrafi 1 të Ligjit Nr.05/L-031 për Procedurën e Përgjithshme Administrative, dhe se duke u mbështetur në dispozitat e nenit 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji vendosi që të hedhë poshtë ankesën si të palejueshme, siç është përcaktuar në dispozitiv të këtij vendimi.

Vendimi hyn në fuqi ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë–Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.695/2025

Atdhe GASHI

Procesmbajtës

Malsore GASHI-BAJRAKTARI

Kryetare e Kolegjit

Vendimi i dorëzohet:

- Ankueses, Xh.P;
- Udhëheqëses së Divizionit të Burimeve Njerëzore në Agjencinë Kosovare për Krahasim dhe Verifikim të Pronës; si dhe
- Arkivit të KPMSHCK-së.